

Jeremy Miles AC
Y Cwnsler Cyffredinol

14 Mawrth 2019

Annwyl Jeremy

Rheoliadau Difrod Amgylcheddol (Atal ac Adfer) (Cymru) (Diwygio) (Ymadael â'r UE) 2019

Trafododd y Pwyllgor Materion Cyfansoddiadol a Deddfwriaethol Reoliadau Difrod Amgylcheddol (Atal ac Adfer) (Cymru) (Diwygio) (Ymadael â'r UE) 2019 (y Rheoliadau) yn ei gyfarfod ar 4 Mawrth 2019.

Nododd y Pwyllgor un pwynt technegol i gyflwyno adroddiad arno i'r Cynulliad o dan Reol Sefydlog 21.2(v).

Mae rheoliad 2(4) yn diwygio paragraff 1(1)(e) o Atodlen 1 i Reoliadau Difrod Amgylcheddol (Atal ac Adfer) (Cymru) (Diwygio) (Ymadael â'r UE) 2009, er mwyn disodli "neu ledled yr Undeb Ewropeaidd" gyda "yn genedlaethol neu yn eu gwasgariad naturiol". Nid yw'n glir a yw "yn genedlaethol" yn cyfeirio at Gymru, ynteu at y DU.

Mae ymateb Llywodraeth Cymru hefyd, y gwnaethom ei drafod yn y cyfarfod ar 4 Mawrth, yn nodi bod Llywodraeth Cymru yn ystyried bod "cenedlaethol" yn cyfeirio at y DU, a'r term "rhanbarthol", sy'n rhagflaenu'r term hwnnw, yn golygu Cymru.

Mae'r mater hwn yn amlygu y caiff termau o'r fath eu defnyddio mewn gwahanol ffyrdd, ac mae i hyn botensial arwain at ddryswch a sefyllfa anfuddiol. Er enghraifft, mae adran 2 o Ddeddf Iechyd y Cyhoedd (Cymru) 2017 yn cyfeirio at "strategaeth genedlaethol", lle mae "cenedlaethol" yn cyfeirio at Gymru. Er y gall y cyd-destun yn aml awgrymu beth yw ystyr "cenedlaethol", ni fydd hynny'n wir



bob amser (a beth bynnag, mae eglurder ar wyneb deddfwriaeth bob amser yn well na gorfod dibynnu ar gyd-destun).

Hoffem hefyd awgrymu nad yw'r dehongliad hwn o "cenedlaethol" a "rhanbarthol" yn gywir nac yn ddigon ystyrllon wrth adlewyrchu'r sefyllfa sydd ohoni yn dilyn datganoli o fewn y Deyrnas Unedig. Rydym yn credu bod hwn yn fater y dylai fod yn hawdd ei newid drwy gyfathrebu rhwng Llywodraeth Cymru a Llywodraeth y DU. Am y rheswm hwnnw, hoffem dynnu eich sylw at y mater hwn i'w ystyried yn y dyfodol.

Anfonir copi o'r llythyr hwn at Weinidog yr Amgylchedd, Ynni a Materion Gwledig.

Yn gywir

A handwritten signature in black ink that reads "Mick Antoniw". The signature is written in a cursive style with a horizontal line underneath the name.

Mick Antoniw AC

Cadeirydd

Croesewir gohebiaeth yn Gymraeg neu'n Saesneg.
We welcome correspondence in Welsh or English

